

PEMBERITAHUAN PERTANYAAN**DEWAN RAKYAT, MALAYSIA**

**DARIPADA : Y.B. TUAN LIEW CHIN TONG
(KLUANG)**

PERTANYAAN : LISAN

TARIKH : 07.08.2017

Y.B. TUAN LIEW CHIN TONG [KLUANG] minta **MENTERI KEWANGAN** menyatakan :-

(a) senarai nama syarikat pelaburan berkaitan kerajaan (GLICs) Malaysia dan jumlah pelaburan mereka dalam pembelian tanah dan hartanah dalam Tun Razak Exchange; dan

(b) senarai nama pembeli-pembeli bon-bon 1Malaysia Development Bhd yang bernilai US\$3.5 billion serta jumlah pembelian setiap pembeli.

JAWAPAN

Tuan Yang Dipertua,

Senarai pembeli/pelabur GLIC di TRX adalah seperti berikut:

- i. Lembaga Tabung Haji - jualan tanah kediaman; dan
- ii. Syarikat milik Menteri Kewangan Diperbadankan ("MKD") - jualan tanah komersial;

Tuan Yang Dipertua,

Setiap Perjanjian Jual Beli adalah tertakluk kepada klausa sulit (*confidentiality clause*, dengan izin) untuk menghormati pertimbangan komersial (*comercial consideration*, dengan izin) pembeli/ penjual. Beberapa transaksi penjualan tanah juga mempunyai terma-terma utama yang berbeza (*key terms*, dengan izin) untuk mencerminkan perbezaan bagi setiap jualan (*nature of each sale*, dengan izin). Namun demikian, terma-terma utama yang diguna pakai secara amnya konsisten dengan apa yang biasanya terdapat di pasaran bagi jenis urus niaga yang sama.

Setakat ini, kira-kira 70 peratus daripada plot yang tersedia di tapak projek Tun Razak Exchange (TRX) telah dikomersialkan. Secara keseluruhan, jumlah jualan telah mencapai lebih RM4 bilion.

Tuan Yang Dipertua,

Dua bon yang berjumlah AS\$3.5 bilion telah diterbitkan oleh 1MDB Energy Limited dan 1MDB Energy (Langkat) Limited. Kedua-dua bon tersebut telah dibeli sepenuhnya oleh Bank Goldman Sachs, sebagai penaja jamin (*underwriter*, dengan izin), yang kemudiannya telah menjual bon tersebut kepada pelabur.

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : TUAN N. SURENDRAN A/L K. NAGARAJAN
[PADANG SERAI]**

TARIKH : 7 OGOS 2017

RUJUKAN : 10041

SOALAN:

Tuan N. Surendran A/L K. Nagarajan [Padang Serai] minta MENTERI DALAM NEGERI menyatakan sama ada Kerajaan mengambil tanggungjawab bagi merebaknya penyakit Tuberculosis (TB) kepada Pegawai Penjara dan sama ada mereka akan diberikan ganti rugi oleh Kerajaan.

JAWAPAN:

Tuan Yang di-Pertua,

Jabatan Penjara Malaysia sentiasa memberikan perhatian dan tindakan yang serius terhadap isu penyakit berjangkit seperti tuberculosis samada ia melibatkan penghuni ataupun pegawai penjara. Langkah saringan, kawalan, pencegahan dan rawatan secara berterusan giat dilakukan dengan kerjasama Kementerian Kesihatan Malaysia.

Oleh itu, bagi mengawal jangkitan tuberculosis ini, beberapa tindakan telah diambil oleh Jabatan Penjara, antaranya:

- i. melaksanakan saringan *symptomatic* terhadap semua banduan yang baru masuk ke penjara dan ini dilaksanakan berdasarkan 'Garis Panduan Saringan Tuberculosis' (edisi tahun 2006). Kementerian Kesihatan Malaysia juga dengan kerjasama Kementerian Dalam Negeri dan Jabatan Penjara kini dalam proses mengemaskini garis panduan ini di mana saringan *symptomatic* tuberculosis akan dipanjangkan juga kepada pegawai penjara;
- ii. menyediakan rawatan lanjut secara berkala kepada banduan dan pegawai penjara yang telah disahkan menghidap tuberculosis;
- iii. memastikan banduan yang menghidapi tuberculosis diasingkan daripada banduan lain;

SULIT

- iv. pegawai penjara yang menghidap tuberculosis akan menjalani rawatan susulan sehingga sembuh sepertimana prosedur yang ditetapkan oleh Kementerian Kesihatan Malaysia;
- v. Bagi memperkemaskan lagi pencegahan dan kawalan tuberculosis pada banduan dan kakitangan, Jabatan Penjara juga telah melaksanakan beberapa langkah selaras dengan garis panduan berkaitan penyakit berjangkit yang dikeluarkan oleh Kementerian Kesihatan Malaysia seperti:
 - a. memastikan penggunaan *mask* bagi banduan yang dijangkiti tuberculosis dan kakitangan yang mengendalikan banduan berkenaan; dan
 - b. melaksanakan pendidikan kesihatan serta kaedah kawalan dan pencegahan jangkitan tuberculosis kepada kakitangan dan menggalakkan mereka menjalani pemeriksaan kesihatan.

SOALAN (93)

PEMBERITAHUAN PERTANYAAN
DEWAN RAKYAT, MALAYSIA

PERTANYAAN : LISAN
TARIKH : 7 OGOS 2017
[ISNIN]
DARIPADA : YB TAN SRI DATO' SERI ABD KHALID BIN
IBRAHIM
[BANDAR TUN RAZAK]

SOALAN :-

YB Tan Sri Dato' Seri Abd Khalid Bin Ibrahim [Bandar Tun Razak] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan hasil sebarang kajian komprehensif dan bersepadu dalam pembentukan dasar pengurusan dan pelupusan sisa pepejal termasuk analisa kos faedah bagi pelbagai metod pelupusan terutama tapak pelupusan dan insinerator.

JAWAPAN :-

Tuan Yang di-Pertua,

Untuk makluman Ahli Yang Berhormat, Kementerian Kesejahteraan Bandar, Perumahan dan Kerajaan Tempatan (KPKT) ini telah menerbitkan Pelan Strategik Pengurusan Sisa Pepejal Kebangsaan (2005-2020). Pelan strategik tersebut telah menetapkan keperluan sebenar negara terhadap pembangunan fasiliti pengurusan sisa pepejal sehingga tahun 2020. Melalui pelan tersebut, pembangunan tapak pelupusan sisa pepejal sanitari *regional*, stesen pemindahan sisa pepejal dan loji rawatan sisa pepejal diberikan keutamaan kerana keberkesanannya telah terbukti dalam menguruskan sisa pepejal dengan kos yang efektif.

Untuk makluman Ahli Yang Berhormat, pembinaan loji insinerator adalah amat diperlukan terutamanya bagi bandar-bandar besar yang menjana sisa pepejal melebihi 1,000 tan sehari. Walaupun pembinaan loji insinerator memerlukan kos pembinaan (sekitar RM600 juta hingga RM1 billion bagi loji dengan kapasiti 1,000 tan) dan operasi yang tinggi jika dibandingkan dengan kos pembinaan dan operasi sebuah tapak pelupusan, tetapi pembinaan loji insinerator akan memberikan faedah jangka masa panjang

kepada negara di mana keperluan untuk mendapatkan tanah, pencemaran kepada tanah serta pelepasan gas rumah hijau dapat dikurangkan dengan ketara. Selain itu, kos operasi loji insinerator dapat dikurangkan sekiranya pihak Kerajaan membina loji insinerator dengan kapasiti yang besar (1,000 tan ke atas) dan membekalkan sisa pepejal yang kering dengan melaksanakan program rawatan sisa makanan di punca.

Untuk makluman Ahli Yang Berhormat juga, Kementerian ini melalui Jabatan Pengurusan Sisa Pepejal Negara (JPSPN) telah memeterai kerjasama dengan Kerajaan Jepun melalui *Institute for Global Environmental Strategies – Ministry of the Environment, Japan* (IGES-MOEJ) untuk membangunkan sebuah garis panduan dalam pemilihan teknologi pengurusan sisa pepejal termasuk faedah kos bagi setiap teknologi yang dicadangkan. Kajian ini yang dijangka siap pada tahun 2019 akan menjadi panduan utama Kerajaan dalam menentukan hala tuju pembinaan fasiliti pengurusan sisa pepejal di negara ini dan akan turut digunakan oleh negara-negara di rantau Asia Tenggara.

Kementerian Kesejahteraan Bandar,
Perumahan dan Kerajaan Tempatan
Julai 2017